


Ikipanga Ikisyobigwe,

Mi Kisu Kyapasi

 Yeso Kristi, Mwanundumiana Gwake, kangi atupele uswe ifindu fyosa ifi fisitantengo mwa Kristi. Uswe tukupalisya kwa Ugwe, Ntwa, panongwa ya fyabupi ifi uswe tukupigwa ukwisila mu Kwiyipa ukukulumba uku ukwapamwanya uku Yeso aatupele uswe pa Kalivari, ukuti ukwene kutusayisaniege kangi ukugomokela mbwinake nu lugano na Ugwe, ukuti uswe tuyege nako ukubatamisa uku ukwakumanya ukuti ukwene kusimbigwe, “Linga ugwe kwitugasya mwa Une, kangi a Masyu Gangu mwa ugwe, ugwe ubagile ukusuma aka ugwe kulondesya, kangu akene kisakubombeligwaga kwa ugwe.” Lilino, uswe tukupalisya panongwa ya iki, kangi tukusuma ukuti Ugwe kutupaga uswe ulwitiko ukuti twitike ikyene na fyosa ifi fili mwa uswe.

² Lilino unko uswe tulibikaga palubafu, Ntwa, ukusukulika kosa ukwa lisiku, ukupasya kosa ukwa bumi, ukufuma ku mpyagilaji ukubuka ku ntimi, ukuti fitikuyangapo nafimo mminogono gitu lilino, loli kukuguulila, ukupilikisya nuluyindiko kwa Mbepo Mwikemo ukuti ikuyoba na uswe, ukuti uswe tubagile ukukaba akandukamo akanunu, ukumanya utwingipo utwa Ugwe, ukwisila mukukomana palikimo. Kabuno, gwe Ntwa, naloliloli iyo yo nongwa uswe twisile pisiku ilipyano ili. Yoba kwa uswe ukwisila mu Lisyu ilyabumi i Lyako, kangi itikisya i Lisyu ilyabumi litugasyege mwa uswe nukusyalikila mwa uswe, ukuti uswe tubagile ukuyengigwa kangi nukumatigwa, komma ku kisu kya pasi, loli ukusanusigwa mukwisila mukupela umbepo gwitu umpya kangi, ukubuka nduko lwa Mwanundumiana gwa Kyala. O, indumbula syitu sikutetema akabalilo kako uswe tukwinogona, kangi ubuhobofu bukuyefuka myoyo gyitu, ukumanya ukuti uswe tubagile ukukoleligwa banabalumiana kangi banabalindwana ba Kyala. Uswe twimile pa bumalikisyo bubo ubwa Kwisa Kwake ukwakibili, kangi fyosa ifisu nu bunyafwale fikutetema pasi pamalundi gitu, fyosa ifindu ifya kisu fikumalika, loli ukuya tumanya ukuti ilisiku limo Umwene isakwisaga nukutwega uswe ku Kitangalala kimo kuko kutisakuyako ubumalikisyo, pamo, ikyene kitisakugutigwamo siku. Kangi ukwinogona ukuti uswe lilino tuli ba—ba baapasi ba Kitangalala kila! O Kyala, butaga indumbula ni mbulukutu syitu umwisyugu, na—na Mbepo Mwikemo, ukwisila mu koosya kwa misi ga Lisyu. Kabuno uswe tukusuma ikyene mu Ngamu Yake kangi ku lwimiko Lwake. Ameni.

³ Une ngulonda ukusegelela ku kimanyisyo ulubunju ulu. Kabuno, une nayaga pakuyoba pa kindukimo ikikindane panandi linga kwatigi kuyepo ulukomano lwa bubumbulusyo, loli uswe tufumwiisye ukuti amakadi ga lwiputo ukupa pa sala ya buhano na butatu, mpaka maminiti malongo matatu ukukinda isala ya buhano nu butatu pamo isala ya buhano na buna pa koloko. Kangi une itolo... Billy isile ku nyumba amaminiti manini aga gakindilepo kangi umwene alinkuti akayapo kifuki nayumo kuno, polelo umwene akaayabenie amakadi. Polelo uswe tuku... Une naalinogwine ukwegwa ilisimbo ili, ukukigolosya ikipanga. Kangi une ngulonda ukuyoba pa kimanyisyo kya: *Ikipanga Ikisyobigwe, Ni Kisu Kyapasi*. Une ngulonda ukubala lilino ukufuma ku Buku gwa Balongi, untu gwa 16, ukwanda ni linandi lya 10.

Kangi Delila alinkuyoba kwa Samsoni, Keta, ugwe unyugiliile une, kangi umbulile isyabusyobi: lilino mbula une, une ngusuma, mumo agako ubagile ukupinyigwa.

Kangi umwene alinkuyoba kwa umwene, Linga ugwe kumbinya une fiyo ni ngoye imbya isi sikabombeligwamo siku, polelo une nisakuyaga monywa, kangi nguyaga bu nnyambala uyungi.

Delila polelo alinkwegwa ingoye imbya nukumpinya umwene palapala nasyo, kangi alinkuyoba ku mwene, Abafilisti bali pa ugwe, Samson. Kangi pala balipo abakubwalala bikugulila nkipinda kila. Kangi umwene alinkuswanyula isyene ukufuma mmaboko gake ukufwana bo tubusi.

Kangi Delila alinkuyoba kwa Samsoni, Mpaka nu mwisyugu ugwe unyugiliile une, kangi umbulile une ubusyobi: mbula une kuko ugwe ubagile ukupinyigwa. Kangi umwene alinkuyobe ku mwene, Linga ugwe kuluka... ifiyabo fihano na fibili ifya'ntu gwangu, nu busikiti.

Kangi umwene alinkupinya ikylene ku ba tupiki, kangi alinkuyoba kwa umwene, Aba Filisti bali pa ugwe, Samsoni. Kangi umwene alinkusumuka ukufuma ku tulo kwake, kangi umwene alinkuyonga nu tupiki utwa matapwa, kangi nu busikiti.

Kangi umwene alinkuyoba ku mwene, Ngimba ugwe ubagili kuyoba bulebule, Une nguganile ugwe, akabalilo kako mu ndumbula yako yikaya na une? ugwe unyugiliile une utubalilo tutatu utu, kangi ugwe ubombi... umbuliliile mumu amaka gako amakulumba giibwalele; kangi ugwe ukambula une kuko amaka gako amakulumba giubwalele.

Kangi ukwene kulinkwisa ukuyapo, akabalilo kako umwene aali mfimbilisye umwene bwila na masyu gake, kangi alinkumumilisya umwene, mpaka umoyo gwake gwaalamukaga ukubuka ku bufwe;

Kangi umwene aalimbulile umwene indumbula yake yosa, kangi alinkuyoba kwa umwene, Akayapo nalino lukisamo mma ulubo pa ntu gwangu; kabuno une ndi Naziri kwa Kyala ukufuma ndwanda lwa mama gwangu: linga une nsengigwe, polelo amaka gangu gikusookangamo mwa une, kangi une ngwisakuyaga monywa, nukuya bo nnyambala uyungi.

Kangi akabalilo kako Delila aaketile ukuti umwene alimbuliile umwene indumbula yake yosa, umwene alinkutuma nukukolela . . . abatwa ba baFilisti, nukuti, Isaga kuno akabalilo kamokeme aka, kabuno umwene ambonisye une indumbula yake yosa. Kangi abatwa ba baFilisti balinkwisa kula kwa umwene, kangi ukulonda ihela mumo, pamo ukutwala ihela mula mu kiboko kyake.

Kangi umwene alinkumpela umwene ukugona utulo pa mafundo gake; kangi umwene alinkukolela ukuti unyambala ise, kangi umwene alinkupela umwene ukumwa ifiyabo fihano na fibili ifya ntu gwake; kangi . . . ukwanda ukunkomamo umwene, kangi amaka gake gaasokilemo ukufuma mwa umwene.

Kangi umwene alinkuti, AbaFilisti bali pa ugwe, Samsoni. Kangi umwene alinkusumuka ukufuma ku tulo twake, kangi alinuyoba, Une ngusookaga panja mumo kwayilaga utubalilo utungi pabutasi, kangi ngwisenyendaga nimwene. Kangi umwene akaamenye ukuti UNTWA aasokilemo ukufuma mwa umwene.

⁴ Kangi une ngulonda ukubala, ukuya tusimbo twa kimanyisyo iki, tukwagigwa kula mwa Buku gwa Busetuli, untu gwa 2, ukwanda pa manandi ga 21 na ga 23.

Kangi une naalimpele umwene ifwasi yakupinduka ukufuma ku bwamalaya bwake; kangi umwene alinkusita kupinduka.

Keta, une nisakuntagaga umwene nkitala, na babo aba bikulogwa ubulogwe nu mwene mu butolwe ubukulumba, pene papo abene bikupinduka ukufuma ku mbombo syabo.

Kangi une ngubagogaga abanake nu bufwe; kangi ifipanga fyosa fisakumanyaga ukuti Une ne yone uyu ikulondesya indepa ni ndumbula: kangi une ngupaga kwa aligwesa gwa umwe ukufwana ni mbombo syinu.

Untwa aliongelelaga ulusayo Lwake ku kubala kwa Lisyu Lyake.

⁵ Samusoni, ikiyabo ikinywamu afwene bo kipanga, aalyandile nu butalusyo. Umwene aalyandile mu njila yakutalusya. Umwene alyandile, kangi umwene akoleligwaga ukuya nnyambala ugwamaka ugwa bukifu. Umwene aalyandile, ukumbombela Untwa, ukuumilisa mu Lisyu Lyake nukubomba Indagilo Syake. Kangi ikyo kyaali mu lukolumo bo kipanga. Ikyene kyaalyandilepo, mumo uswe tubagile ukuyobela, ukuya kifumusyeye kya nkisu, kyaalyandilepo pa kilundi ikitalusyeye. Kilinkwanda ukukongesya Indagilo sya Ntwa. Kangi akabalilo kosa Samsoni akongesyaga Untwa, Untwa ambombelag'imbombo Samsoni.

⁶ Kabuno, Kyala abagile ukumbika aligwesa kangi ukubombel'imbombo aligwesa uyu ikukongesyaga Umwene, kabuno iyene yo mbombo ya Kyala. Loli akabalilo kako uswe tukusyumbutuka ku lubafu, ukusookako ku findu fya Kyala, akabalilo kala Kyala akabagile ukutubombel'imbombo uswe kangi'mma. Akabalilo kako uswe tukwenda kisitapepeluka ukukongesya Indagilo sya Kyala, akabalilo kako uswe tukwitugasyaga mmani ga Libangeli nukwiputa ukwisila mu Lisyi ilisimbigwe, ukummwiputa Umwene mwa Mbepo kangi m'Bwanaloli, polelo Kyala abagile ukubombel'imbombo umundu aligwesa. Loli akabalilo kako abene bikwega ubwinogono ukusyumbutukila ku lubafu ukukonga ikindukimo ikingi, polelo Kyala akabagile ukubombel'imbombo umundu yula kangi'mma.

⁷ Polelo, Samsoni ikupela ikyakwimila iki—iki ikyapabwelu fiyo ikyo kipanga ikyo mwisyugu. Akabalilo kako ikipanga kyaalyandile, Kyala akibombelag'imbombo ikipanga, kabuno ikipanga kyendaga mosanamosa ukukonga Indagilo sya Ntwa, kilinkuumilisa mu bulongi Bwake bosa kangi ingomelesyo Syake, kangi kyaabomba Indagilo Syake syosa. Kangi Kyala aali nakyo ikipanga kyake. Loli ikyene kikufwana ukuyapo ukuti bulipo ubuyo ubwa luko lumo ulwakupel'ubonywa nkati nkipanga.

⁸ Kumbukilaga, uswe tukaya pa luseko lwa pikiniki'mma, loli uswe tuli ku bwite. Abandu bingi bikwinogona itolo ukuti akabalilo kako abene bikuya baKristi ukuti ikyo kyo fyosa ifi abene bikulondigwa ukubomba, ukuti ikyo kikubotesya ikyene kwasyepwa, pakuti abene bo baKristi kangi fyosa fikuyaga fipepe. Komma ukutwala ikyo muntu gwako. Kabuno, une nguya Nkristi ukulwa, ukulwa ubwite ubununu ubwa lwitiko. Une ndinkuya Nkristi ukuti nise mu lukindi lwa bwite. Uswe twe basikali ba kiKristi, kangi uswe tukufimibilisigwa ukumanyisigwa nukukusigwa, kangi nukumanya bosa ubumang'anyi bwa ndugu, ukumanya mumo ukwiponesya, ukumanya mumo uku—uku ukulwa ubwite. Kangi

uswe tubagiile ukubomba ikyo pene papo Mbepo Mwikemo ikusetulaga ikylene kwa uswe. Uswe tukabagila ukwega iki ikisu ikingi kitubula uswe akabalilo kako uswe tukubuka ku bwite, simo mwa nyinogono syabo. Loli uswe tukufimbilisigwa ukwega inyinogono syitu syene, injila yiyo Mbepo Mwikemo abagile ukutulongosya uswe, kangi syo nyinogononki isi Umwene ikutupaga uswe, panongwa yakuti Umwene yo Mwalafyale uyu yo N'dagili gwa basikali ba kiKristi.

⁹ Samusoni aabombile inunu, umwene ali nnyambala unkulumba mpaka umwene aalyandile uku, aalyandile mu luko lumo (uswe tubagile ukukikolela ikylene) ukwendendeka posaposa, mpaka umwene alinkwanda ukusooka panja pa bwitugasye bwake mwene. Kangi ikipanga kyendaga kanunu, kangi fyosa fyali fitalusye mpaka abene balinkwanda ukusookapa panja pa mpaka gwabo. Samusoni alinkwanda ukuhula. Kangi umwene umwene akahulaga na balindwana ba kiIsraeli'mma, umwene alinkwanda ukuhula na balindwana ba kiFilisti.

¹⁰ Kangi ikyo kyo mu luko lumo kifwene na iki ikipanga kibombile. Ikyene kikapelamo siku ulugano na bake kyene, ikylene kilinkubopela abapanja kangi ikylene kilinkwanda ukuhula na bapanja. Apo po apa uswe tupelile ubusobi bwitu ubukulumba, kangi bumo mwa busobi ubukinde bosa, ko kabalilo kako ikipanga kikwanda ukubomba ifindu ifi fikaali fitalusye'mma. Ikyene kilinkwanda ukuya nu bwinake, bo yu Samsoni, ubwinake ububibi.

¹¹ Samsoni, akabaloli kosa aka umwene ali mbwinake na bandu ba Ntwa, umwene abombaga kanunu. Loli umwene bo aandile ukwendendeka nu bwinake ububibi, polelo umwene alinkuya mu lutamio.

¹² Kangi iyi yo njila yiyo iyi ikipanga kilimo. Akabalilo kako ikipanga kyaakongesyaga nuluyundiko kangi bwila ukukongesya ukulongolela kwa Mbepo Mwikemo, Kyala abasayaga abene, kangi nifika ni fimanyila ni fiswigo fyakongaga ikipanga. Loli akabalilo kako ikylene kilinkwanda ukwendendeka nu bwinake ububibi, ni kisu kya pasi! Kimo mwa findu ifibibi fiyo ikylene kyaabombile, kangi ikindu kyakwanda iki ikylene kibombile, ikylene kyandile ukupaguka, ukuswanyulania ubwinake pakati pa bitiki abangi, panongwa yakuti abene basyagenie ukuti ifisu fyapagwike. Loli Inongwainunu ingulumba iyi yikabikigwa ku kisu kimokyene pamo abandu ba luko lumolwene. Iyene yipayiligwe ku "aligwesa uyu iganile, mwitikisya umwene isege," ifisu fyosa, ifikolo, indimi na bandu. Kyala akaaliganilemo siku ukusimba imikolofwa ya mipaka.

¹³ Loli abanyambala baalondaga ukuya bo, abene bikwipimisya, pamo ukwegelela, ukwenda bo i-i kisu kikubombela, ukuyoba ifindu ifi abene bikubomba, ukuya

bafyuke mumo abene baali bafyuke. Uswe tukabagile ukuya bafyuke siku mumo ikisu kyapasi kikubombela. Uswe tubagile ukuya baponjoli pene papo uswe tukukongesya ingomelesyo sya Kyala kangu injila Yake iyakubombela ifindu. Uswe tukabagilamo siko, ukwisila mukwegelela ikisu kya pasi. Langa ikampani ya ngamo yifikile pa buponjoli bwake ubukulumba ukukinda ukwisila mwa televiziyoni, kangu ifilundilo fya bwalwa na kachasyo fifikile ku buponjoli bwabo ubukulumba ukukinda bosa ukwisila ku lusangulo lwa televiziyoni, ikyo kikaya kimanyilo ikyakuti ikipanga kisakufikaga ku buponjoli bwake ukwisila ku televiziyoni. Ukuponjola kwa kipanga kugonile mu kulumbilila kwa Inongwainunu, ukwa Maka ga Kyala, kangu ukubonesya kwa Mbepo. Uswe tukabagila ukuyoba ukuti panongwa yakuti itelevizioni yibombile *ikyakuti-ni-kyakuti* ku kampani ya ngambo kangu ni—kangu na makampani agangi! Uswe tukaya nalyo ni Lisimbo lililyosa ilyakugela ukwipimisa ba bandu bala. Kangu akabalilo kosa uswe tukubomba, uswe tubagile ukutwala ifilundilo ifikulumba, loli ikyo kikaya kikyoo Kyala atutumile uswe ukubomba. Uswe tukwinogona panongwa uswe tuli langi syosa, ukupululuka mmwanya, ifibugutila ifikulumba, ukutendeka ifindu ifikulumba ifyalangi ukuboneka, ukuti ikyo kyo kuponjola. Uswe tukufwa ilisiku lililyosa pa malundi gitu, ukuyobela mwambepo! Langa uswe twalimile abandu maelifuelifu kalongo ulubunju ulu, kangu u Mbepo Mwikemo akaali na uswe umma, uswe twayaga pakubomba kanunu ukwima ukuta kalongo tuli na Mbepo Mwikemo na uswe. Uswe tukabagile ukwipimisa ni kisu kya pasi.

¹⁴ Kangu kimo mwa findu fyakwanda, kyaali, ikipanga kilinkwanda ukupaguka bene. Ikipaguko ikyakwanda kya kipanga kya Katolika, kangu polelo kilinkwisa ikipanga kya Luteri. Akabalilo kako abene baapagwike nkipanga kya Katolika ukutendeka ikylene ukuya kibugutila, ilisiku limo yaalipo inguuto, “Aba Filisti bali pa ugwe, Samsoni,” kangu Samsoni alinkulasulania ingoye isya bupinye bwa kipanga kya Katolika, kangu Martin Luther alinkusooka panja, na fifipaguko.

¹⁵ Polelo abene balinkukipinya ikipanga nu lugoye ulungi, mumo Delila abombiile. Kangu abene balinkwanda...mbuyo mwakuya nu nnyambala unkoleligwa-na-Kyala, unnyambala aba bakoleliigwe na Mbepo Mwikemo; lumo bakabamenye aba ABC babo, loli abene balimmenye Kristi. Polelo ikipanga kilinkuya kyalubatiko, kangu balinkwegelela ukufuma kwa bayoba ndyali. Kangu abene balinkubapa abalumbilili babo “idigiri lya dokotala,” aligwesa afimbilisigwaga ukuya yo Dokotala gwa Bunyakyala. Ulo lwaali lugoye ukwakupinya ikipanga. Abanyambala bikusooka kangu nukufunda, isukulu ya bunyakyala yililyosa ikugela ukusosya unfundigwa unnunupo

ukuti ikipanga kyabo kibagile ukwitufya, “Untimi gwitu yo gwa Dokotala gwa Bunyakyala.” Kangi ngimba kyo kiliku iki abene baabombile? Yumo ikugela ukuya nu bumanyi bwingipo ukukinda uyungi yula. Ena, ikyo kitikusanusya ni kindu nakimo mmaso ga Kyala.

¹⁶ Kangi kikayapo ni kyakulondigwa ukuti unnyambala aligwesa agelege ukwega ubumanyi bwa nkisu kyapasi kangi nukunhobosyamo siku Kyala nu bwene. Ubwene bo mwiko mmaso ga Kyala! Ugwe utisakunhobosyamo Kyala siku nu finyonyo nu bumanyi ifya kisu kyapasi, panongwa yakuti “ikyene bo bulugu kwa Kyala,” likuyoba i Lisimbo. Umwene akabagile ukubomba ikylene.

¹⁷ Kangi aligwesa ikugela ukuya nabo ubumanyi bosa. Abene bamenye itolo ikyakubomba kangi amasyu agakuyoba, kangi ubwene bukuya itolo buyobi bwa ndyali mbuyo bwa kubonesya kwamaka, Ndumi ya Mbepo Mwikemo iyi yikwiyubika mu ndumbula ya mundu kangi nukusyaga imbibi syake. Abene bamanyisigwe ku buyobi bwa ndyali, kangi uswe tutikulonda ikyo umma. Paul aayobile, “I Lisyu lisile kwa uswe, komma mwene. . . pamo, Inongwainunu, mi Lisyu lyene, loli ukwisila mMaka kangi ukubonesya kwa Mbepo Mwikemo.” Ikyo kyatwele Inongwainunu, ukubonesya amaka ga Mbepo Mwikemo! Loli abanyambala bosa aba bikubuka panja kula ku sukulu ya bunyakyala kangi abene bikufunda ubumanyi ubukulumba, mumo abene babagile ukwimila pankyeni pa bandu, mumo abene babagile ukwitwalila bene, mumo abene bikufimbilisigwa ukufwala kangi mumo abene babagile ukubombela, abene bangisakubombelamo siku u galamala unsobi. Lilino, ifyo fili kanunu ku buyobi bwa ndyali, loli uswe tutukongesya amasyu agakusonga aga mundu. Paulo aayobile, “Inongwainunu iyi une ngulumbilila yikaalisile bo ulu umma, loli Iyene yaalisile ukwisila mu kutendeka u—u Mbepo Mwikemo umpya na Maka ga mbonesyo.” Yitakwisa nu buyobi ubutendeki kanunu mma, iyi amahala gako gabagiile, pamo ulusubilo lwako lukuyaga mmahala ga mundu. Loli iyene yikwisa nu mbonesyo sya Maka ga Kristi uyu asyukile. Iyo yo Nongwainunu, “Ukummanya Umwene mMaka ga busyusigwe Bwake.”

¹⁸ Aligwesa ikugela ukwinogona umwene yo nkomupo ukukinda unnyambala uyungi, ikipaguko kilikyosa. Aba Methodisti bikuyobaga, “Uswe tulinayo unnyambala unkomu ukukinda bosa.” Aba Baptisti bikuyobaga, kangi aba kipanga kya Kristi, kangi na polelo fyosa, abene bosa, “Uswe, uswe twe bakomu ukukinda bosa. Uswe, abandu bitu—bitu, uswe tutikwitikisya unnyambala itolo ugwaitolo ukubuka panja nukulumbilila Inongwainunu.” Loli abene bikusalapo itolo abene. (O Kyala, yaga ni kisa!) Ukusalapo itolo abene; linga abene bikukongesya-mumo ni kimanyisyo kimo ikyabo, polelo abene bakubabika abene nkipanga. Kyala akabagila

ukummpalamasya umwene mu njila nayimo. Une ngulonda umunduyumo ukulumbilila kwa une uyu asosoligwe-pakiboko nu Mbepo Mwikemo, Kyala ankusisye umwene, komma ukusosoligwa nu mundu pamo ikipaguko.

¹⁹ Ubumanyi bosa! Abene bikuyoba, “O, uswe tumenye fyosa ifwakufwana ni Yene,” kangi bamo mwa bene bakamanya u alifabeti gwakwanda ugwa Mbepo Mwikemo. Abene bikukana Ikyene.

²⁰ Ikyene kikungumbusya une isya kabuku akanini aka nafundile ilisiku limo mu California, ukufwana ifyinja kalongo ifi fikindilepo. Une nakapimbile akene n’duka lya mabuku ilyaiyolo. Une nibibwe ukuti unsimbi ali ywani. Itolo akabuku akanini aka matambala-kalongo, loli akene kaali ni fundo yimo inunu ku kene palema nalinga akene kabonekaga kaasunga kangi kaabukomu. Loli, une nakyagilemo ikindikimo mula iki kyaapilikigwaga ukuya bo Kyala, kwa une. Kangi kamo mwa tupango utunini kalinkwanda bo ulu. Ulubunju lumo mu kikunda kya nguku ikikulumba, kaalipo akamukolwe akanini kamo aka kinogonaga ukuti umwene aali nu bumanyi bosa ubu bwalipo ukuya bumayigwe. Polelo umwene alinkupululuka mmwanya pa kibokosi nukukoma undomo gwake unnini ku kibokosi, kana pamo kahano, ukusopela kunyuma akatu akake akanini kangi nukukokolika munjila iyi ugwe ukapilikamo siku umukolwe akokolikemo. Kangi abangi, umwene akwabilaga amaso gosa ku mwene, kangi umwene alinkuti, “Bakikulu na banyambala aba kikunda kya nguku iki, une ngulonda ukuyoba kwa umwe mwesa ulubunju ulu pa lubatiko lwa bumanyili ulukulumba ulu uswe tutendike lululu ulu.” Alinkuti, “Une nalondesyaga ubumanyi bwingi fiyo mu kufunda kwangu,” akabalilo kako umwene ikukwabila amandalasi ga pa mbulo yake innini. Kangi umwene alinkuti, “Une ninogwine ukutu uswe twe nguku tubagile ukwinosya kanunupo ukwisila ukuya nu bumanyi bwingipo. Polelo, une mbagile ukubabula umwe ukuti kuko, linga uswe tukukumbaga nukubomba mu kikunda pamo nkibwina kimo, uswe tukuyagaga i vitamini yimo iyi yikutupelaga uswe ukukokolika kanunupo, amayoya amamogipo. Kangi, o, une mbagile ukubabula umwe mumo uswe tubagile ukwinosya twibene mu njila ingindanengindane nyingi.”

²¹ Kangi utunguku utwanakasi nutupeso twabo utukesefu utunini, utwene tulinkukuuta nukuyoba, “Ngimba umwene akaya gwakuganigwa?” Kangi abene naloliloli balinkunyonywa umwene. “O, umwene yo mkolwe unkomu gwa luko lumo!” Kikungumbusya une isya bamo mwa aba apa abalumbilili ba ku seminale. “Unnyambala unkomu fiyo! Kukayapo nukulondigwa ukuti uswe tukongesyege inguku isingi, uswe twesa tukufimbilisigwa ukubuka nu mwene.”

²² Ena, bo umwinitu unnini akali nukumalisya ubuyobi bwake, yalipo inguku innini iyingi iyi yikali na mayoya amamwekuke mma, yikwisa yikubopa nkati ukufuma ku lubingilo lwa nguku syosa, kangu yilinkuti, “Balumyana, gulila panandi itolo! Une mbilike ulufumusyo pa wailesi lululu ulu. Inguku sifyukil’untengo na matambala mana ukufuma pa paundi, uswe twesa tukubuka kububutigwe kilabo! Ngimba bo bununu buki ubu ubumanyi bwako bukubombaga?”

²³ Nkundwe, ubumanyi bosa ubu uswe tubagile ukulundika, kyo kinunu kiliku iki ubwene bukubomba? Uswe twe mfu gwa ma fiti mahano-na-limo! Uswe twesa tukufya pa inchi kangu pa miniti. Ubumanyi bwitu butikusanusya nakimo. Uswe tukulonda ukumanya umwene. Loli abene bikubomba ikyo.

²⁴ Mumo une nayobaga akabalilo kamo aka kakindilepo ukufwana na kapefya akanini kamo, kangu umwene inogonaga ukuti umwene aamenye ubumanyi bosa ubu—ubu bwalondigwaga ukumanyigwa, kangu umwene aamenye fingi fiyo mpaka umwene abagile ukugabula amapefya gosa agangi isyakifwana na bandu. Polelo umwene alinkupululuka pamwanya pa kikunda kangu umwene alinkwanda ukuyoba isya bandu, mumo umwene abamenye bosa aba abene. Kangu, nakalingalinga itolo, umfundi ukufuma ku Purdue alinkusegelela nukwanda ukuyoba amasyu amapuputigwa—mmwanya gamo kwa umwene, kangu umwinitu unnini yula alinkukopesya itolo amaso gake kangu alinkusyumbutula untu gwake kangu. . . Lilino, umwene aali na maso, umwene abagile ukunketa umfundi. Umwene ali ni mbulukutu, umwene abagile ukumpilika umwene. Loli, ena, umwene akaamenye iki umwene aayobaga. Fiki? Umwene aali nu bongo bwa mapefya. Umwene yo itolo bongo-bwa-njuni. Ikyo kyo kyosa iki umwene ali nakyo. Umwene akaya nu bongo bwa bandu, polelo umwene akabagila ukwinogona bo bandu mma.

²⁵ Kangu mulamula umundu akabagile ukwinogona bo yu Kyala! Ugwe uli mundu, kangu ubumanyi bosa ubwankisu bukakinda ubongo bwa lipefya. Kyosa iki ugwe kubomba, ugwe itolo kwifulasya gwimwene na bwene. Ugwe kufimbilisigwa ukuya na minogono ga Kristi.

²⁶ Inongwa iyi abandu bikwingila nu kuya yumo ni fipaguko, kangu nukupyanikisya uluponio lwa pakiboko mbuyo bwa bubapigwe ubupya, abene bikugela ukukilania ubupapigwe ubupya. Abene batikulonda ubupapigwe ubupya. Kangu abene—abene bamenye ukuti uswe tukumanyisya ikyene mw’Bangeli, polelo abene bikulonda ukubikapo ikindukimo ikingi pa kyene. Kangu abandu ba kiPentekosti bope bafwene itolo ububibi, ukugela ukubikapo ikindukimo ikingi! Abene bikukilonda ikyene mu bwapamwanya. Ikyene kiyege itolo kyapamwanya fiyo, “Uswe tukuponaniaga pa kiboko nikwingili nkipanga, nukuya nnyafiligwe pamo mosigwe,” pamo ikindukimo. Abene

bikutiila ubupapigwe ubupya. Une utubalilo tumo sikunyaga ukuti Branham Tabernacle aandile ukutiila ubwene!

²⁷ Lilino, uswe twesa tumenye ukuti ubupapigwe, une ndikupasya ukuti ubwene buli kugu, pamo kugu, pokipoki, ubwene bo kinyanyasi. Linga u mwana apapigwe pabutagilo imindu, pasi apa pakafu, pamo nkipinda ikimogesye-ni-langiya-pinki mu kipatala, ubwene bo kinyanyasi, munjila yiliyosa. Ubupapigwe bwa ngwata, ubupapigwe bwa kilikyosa ikingi, bo kinyanyasi.

²⁸ Kangi ubupapigwe ubupya bukaya bunandipo ukukinda ikinyanyasi! Loli abandu bikuumilisya fiyo, “Uswe tukubukaga kulakula kuko abene bikuponia pakiboko. Uswe tukubukaga kulakula kuko abene batikuywega nukukuuta, nukukuba pakigemo nukukuuta nunjwego.” Ugwe kulonda ukuya gwa bundy fiyo! Iki uswe uswe tukulondigwa ku bupapigwe, ukufwa naloliloli, ikyo kyo kikutwala panja u Bumi!

²⁹ Imbeyu, imbatata ingulu, imbeyu ya mbatata, ugwe kwegu imbatata yila kangi ukuyibika iyene mumfu. Mpaka ugwe ubagile ukuya ni mbatata imbya, imbatata inguulu yila yikufimbilisigwa ukubola. Ikilombe kikabagila ukutwala ubumi ubupya mpaka ikylene kiyege kibolano.

³⁰ Kangi unnyambala pamo unkikulu akabagile ukuya nu bupapigwe ubupya mpaka amahala gabo nu bwikyele bwabo bwene bukuya bubolano, bufwano, bufwege bosa pa kigemo, nukukuuta, ukuya posa ikinyanyasi mosa, ukubuka ku buyo bwakuti ubumilisi bukusookamo mwa kolala gwako, kangi ugwe kupapigwa kangi nu Mbepo gwa Kyala. Une ndikupasya kali ugwe kukuta, kuyobela mu ndimi, kunyela-nyela, kubopabopa bo nguku iyi untu gutumuligwe, ugwe kutwala panja u Bumi ubupya! Loli uswe tubikilepo ikindukimo pa ubwene, uswe tukulonda injila yapamwanya, naloli.

³¹ Ilisiku limo, Kihano, unkasi na une twabukaga ku liluka. Une ndikulonda ukukwandisya ku kwandisy pa iki. Loli akabalilo kako uswe tusulukege ulukindi, une ndinkumilisya ukukelengania uko na kula, abakikulu aba baalibwasi. Une naafingile kwa Kyala akabalilo kako une naali mundu mfwamaso, ukuti linga Umwene ikumbumbulusyaga amaso gangu ukuti une nguketaga ifindu ifi fyaali finunu. Kangi une mbikile akapingika akanini kapayikigwe mwigali lyangu. Akabalilo kako une nguketa ifindu fya luko ulo, une nguketa pa kipingika nukuyoba, “O Kyala, Ikyo kyo Kibwalalilo kyangu,” akabalilo kako une nguketa ku kipingika.

³² Une naaketile abakikulu bala. Meda alinkuti, “Uswe tukaketapo unkikulu yumoywene ntiga umwisyugu uyu afwele isiketi.” Kangi umwene alinkuti, “Bill, nkete unkikulu yula pala uyu ali nu tugoye ukusyungutila pamwanya pa mbili gwake,” kangi alinkuti, “ugwe kusanusya ukumbula une ukuti

unkikulu yula akamanya ukuti ikyo kyo mwiko?” Alinkuti, “Linga umwene akamanya ukuti ubo busobi, kokuti umwene asyutilemo untu.”

³³ Une ndinkuti, “Gulila pa panandi, luuki. Umwene yo gwakiMerika, umwene ikubomba mumo abakiMerika bikubombela.” Une ndinkuti, “Une naali mu Finland kakakindapo akabalilo katali’mma, nnogandumbula.”

³⁴ Kangi une ndinkulalusya kula ku nnyambala uyu alinyikesye pasi, Doctor Manninen. Kangi uswe twabukaga ku—ku boogelo ukwabwifyusi, iki kikukoleligwa “sauna,” kangi abene bikukwingisya ugwe mula nukukonelela amisi amapyu, pamo amisi pa mabwe amapyu, kangi ikyene kikupa ugwe amafuke itolo. Polelo abene bikukupela ugwe unyelele mmisi aga matalala, kangi akabalilo kako ukusookamo. Polelo ugwe kwiyega ugwe ukwingila nkipinda, kangi mula alimo unasi gwakikikulu mula, abakikulu aba bikukulumula abanyambala (kangi abene balibwasi), ukubatuma abene ukugomokela nkisiba. Une ndinkutoligwa ukwingilamo. Kangi une ndinkuti, “Doctor Manninen, ubo bo busobi.”

³⁵ Umwene alinkuti, “Umma ndaga polelo, Ngindikigwa Branham, ubo bo busobi. Polelo bule aba dokotala ba kiMerika aba bikumfuula unkikulu ukuyabwasi nukundambalika umwene pa kigemo, nukumwenesya umwene ubwasi—ubwasi bwakikikulu ubu umwene ali nabo? Bule aba nasi binu mfipatala?”

³⁶ Une ndinkuti, “Nhubokela une, Nkundwe Manninen, Manninen, ugwe kotalusya.”

³⁷ Ikyene kyo fiki? Isyene syo nyiho. Akabalilo kako une naali mu Paris une ndikutoligwa ukwitika ikyene, ukuti kubutundilo amatusi ifya bosa abanyambala na bakikulu kyaali kimokwene kilakila. Une ndinkusita kukipilikisya ikyene, ifibusu fyaali lubafu lumu ulwa lukindi fili fya bosa abakinyambala na bakikikulu. Une ndinkusita kwitikisya ukuti akabalilo kako abakikulu baabukaga ku nyanja ukoogela, undumiana nu nnogandumbula gwake, abene bakaya nifipinda fyakufwalilamo’mma, abene itolo baafuulaga ukufika ku mwenda ugwabumalikisyo, polelo ukusyumbutuka inyuma syabo nukufwala akagoye akanini nukubuka ukoogeela, loli ikyene kyo momumo. Abene batikupasya ku kyene mma. Ulwene lo lwiho lwa France.

³⁸ Mu Afrika, abakikulu na banyambala, abakeke na bakangale, imyenda nagimo napanandi, ukwenda ukukinda ndukubo. Bakaamenyemo siku ukuti ikibusu kyo fiki, pamo ifindu bo ifyo, pamo bakabukamo siku ukusookapo pankyeni pa yumo nu nnine. Loli abene bakamanya nakamo ukukindana. Abene bakamanya nakamo ukukindana. Loli ulwene lo nyiho sya fisu.

³⁹ Loli une ndinkuti, “Luuki, uswe tukindene, uswe tufumile ku Kisu ikingi. Uswe twe bendanjila kang’i bahesya apa, ikyo kyo kikupela ifindu ifi ukuboneka ukuya fisobi fiyo. Kabuno i Libangeli lyaayobile, ‘Abene aba bikwikolela ukuya luko ulu, abene bikubonesya ukuti abene bo bendanjila kang’i bahesya, abene bikulondesya akaya aka kikwisa.’”

⁴⁰ Unnyambala pamo unkikulu mu Italy, mu France, mu Afrika, mu kisu kilikyosa ikingi, uyu apapigwemo kang’i mwa Mbepo Mwikemo, atikubomba ifindu ifyo. Abene batisakufwala imyenda igyo. Abene batisakubombaga bo ulu mma, panongwa yakuti abene ba Kisu ikingi Kikyo Un’dagili nu Umpeli yo Kyala. Uswe tufumile ku Mwanya. U mbepo uyu ali mwa ugwe, ikukasya ubumi bwako. Linga ugwe uli mMerika, ugwe kubombaga bo abaMerika bikubombela. Linga ugwe uli mFrenchi, ugwe kubombaga mumo abaFrenchi bikubombela, nukutuka ikisu ikingi. Loli linga ugwe uli gwa Kyala, ugwe kubombaga mumo abene bikubombela ku Mwanya, panongwa yakuti u Mbepo gwako ikufuma ku Mwanya kang’i Umwene ikukulagila ugwe.

⁴¹ Ikindukimo ikinini iki ugwe ubagile ukuketa. Mu Lisimbo, abene aba balondesyaaga a Kaya akapya aka, babombelaga mbukindane. Abene biifumusyaga ukuti abene baali bendanjila kang’i bahesya. Loli ku lubafu ulungi ulwa Kaini, abene balinkuya babopabopa kang’i bagasi. Loli abaKristi baali bendanjila kang’i bahesya. Umbopabopa akaya na kaya’mma, un’gasi yo mundu umpelabusingya. Loli umwendanjila yo kindukimo ikyabwanaloli, kang’i ikufuma ku buyo ubwabwanaloli nKisu ikingi, ikugela ukuyaga injila yakubukila ku Kaya, ukufumusyaga nu bwitugasye bwake ukuti umwene alinakyo ikindukimo ukuti umwene afumile ku Kisuyu ikingi. Iyo yo nongwa.

⁴² Loli palema abandu bala aba bikubomba lulo, abandu bala aba bikufwala ifindu ifyo, unko une ngubule ugwe. Mu South Africa, akabalilo kako une naaketile abapanja abasitakupalamaasigwa maelifu malongo matatu, balingelebune, abakulakula bakwenda na mabulangete. Abafyinja kalongo-na-fihano-na-kimo-, kalongo-na-fihano-na-fitatu, malongo-mabili abalindwana, abalumiana kisita numwenda unsoone nagumo, bimile pala na matipa mfiyo fyabo, kang’i biipakile mosa, ififupa fitobwile imbulo syabo, kang’i utupanda twa mipiki tupayikigwe ukufuma mu mbulukutu syabo, nukupingika ififupa fya bandu pamo ififupa fimo mu nywili syabo, amino ga finyamana fipayikigwe pa bene, bali bwasi mumo abene balisiile nkisu kya pasi, kang’i bakakimeenye ikyene mma. Loli akabalilo kako abene balyaambiliile u Kristi, kang’i balinkugwila ifiyo fyabo nukwambilila Mbepo Mwikemo, abene balinkusumuka nukupeteka amaboko gabo ukufisa isoni kusi kwabo, akabalilo

kako abene basokengepo nukwakwaaga imyenda igyakuti bafwale. Fiki? Abene balinkuya bendanjila kangsi bagesya ku kisu kyapasi. Haleluya! Abene baali kubutali ukufuma ku Mwene. Ena, nkulumba.

⁴³ O, ena, abandu aba bikwikolela bene ukuya baKristi. Abene biingil'ikipanga. Abene bikubuka nukuti, "Uswe twe baMethodisti. Uswe twe baBaptisti. Uswe twe baPentekosti. Uswe twe ba Seventh-day Adventisti. Uswe twe *iki, ikyo* kangsi *ikingi*." Ikyo kikaya nakyo nakimo ikyakubomba ni kyene. U mbepo gwako, ubumi ubu buli mwa ugwe, bukukasya nu kukubula ukuti ugwe uli fiki. Yeso aayobile, "Ni fipaso fyabo ugwe gwisakubamanya abene."

⁴⁴ Ikipanga kiisile ukuya bo Israeli, ikyakwanda. Abene bafiketile ifikolo ifyapanja fyosa fikuya nu mwalafyale. Kyala aali yo Mwalafyale gwabo. Kangsi abene baaketile ifikolo ifyabapanja fili nu mwalafyale, polelo abene baalondaga ukubombela bo fikolo ifyabapanja, kangsi abene baalitwalile bene u mwalafyale. Kangsi akabalilo kako abene baabombile ikyene, abene balinkwingila mu lutamio. Panandipanandi ikyene kilinkwanda ukwingila. Panandipanandi ikisu kilinkwanda ikwingila mwa abene. Kubumalikisyo balinkwaga bali na Ahabu. U mwalafyale yumoywene ikwisa itolo kifuki panini ku kyene, kifuki panini ku kyene, kangsi kubumalikisyo ukufyolotola ubumi ukufuma mu bene. Kangsi pala abene balinkubuka. Kangsi akabalilo kako u Mwalafyale ugwabwanaloli alinkwisa, abene balinkusita kummanya Umwene.

⁴⁵ Ikyo kyo kindukimo kilakila iki ikipanga kibombile. Ikyene kyegeliile. Po apa umwe mulipo. Ikyene kyegeliile indyali, ubumanyi. Ikyene kyegeliile ukwipanganya, ifubugutila, ifipanga ifinywamu, abalumbili aba bikwitufya. Kangsi akabalilo kako u Mwalafyale ugwabwanaloli ikwisa, abene batikummanya Umwene, kangsi abene bikukomelela yulayula u Mbepo Mwikemo uyu yo Mwalafyale gwabo. Abene batikummanya Umwene, loli abene bikunseka Umwene nukummugila Umwene. Mumo abaJuda baabombile kwa Mesiya gwabo, ikipanga kikubomba kwa Mesiya gwabo munjila yilayila. Abene bakakimanya ikyene. Abene bakayanako mma ukuketesya kwamwambepo, panongwa yakuti abene bingile-mfimanyisyo fiyo na maso gabo na ifi abene bikuketa, iminyumba iminywamu, ukugela ukwifwanikisyana ni kisu kya pasi. Uswe siku tukafyuka—tukafyusigwamo ukuti tufwanikisigwege ni kisu kya pasi. Uswe tufyusiigwe ukuti twiyufyege twibene.

⁴⁶ Kangsi, yumoywene yo bandu-bingi, mwa Kyala. Kangsi umwisyugu mu balumbilili balubumbulusyo aba bali panja mmigunda, balipo abaluko lumo ulwakulwana, ukuti unkulumba ywani. Yumo ikuyoba, "Ena, saya Kyala,

une ndinabo amaelifu gakuti. Une ndinalo ulukomano ulunywamupo ukukinda ulu ugwe ulinabo.” Ko kukindananki uko ikyo kikupela? Uswe tuli nagwe yumoywene pamo elifu-elifu yumoywene, ko kukindananki uko ikyene kikupela? Ngimba uswe tuli ba bwanaloli kwa Kyala? Ngimba uswe tuli ba bwanaloli ku Lisyu Lyake? Ngimba uswe tukwima pa lugelo lwa Mbepo Mwikemo? Ngimba ikyene kyabwanaloli? Ikyo kyo kindu ikinywamu ukukinda.

⁴⁷ Loli uswe tupepwisyepe pa Libangeli. Abandu bitu baPentekosti bingi, pa fimanyisyo ifyakubwandilo ifya Libangeli, bikupepusya. Balipo... Une ndikulonda ukufulasya ubwipilike. Une nili mu kipanga kyangu nimwene, kangi une ngwipilika ukuti une—une mbagiile ukubomba itolo iki mu kipanga kyangu, panongwa yakuti une ngulumbilila Inongwainunu. Loli balipo malongo ga maelifu ga balumbilili ba kiPentekosti bamenye ukuti kikayapo ni kindu kya luko ulo mwi Bangeli bo ukosigwa mu ngamu ya “Tata, Mwanundumiana, Mbepo Mwikemo.” Une ngusania u bishopunkulumba, pamo aligwesa, ukunsosolela une pabuyo papo aligwesa alyosigwemo siku mu ngamu ya “Tata, Mwanundumiana, Mbepo Mwikemo.” Loli abene bikupepusya, panongwa yakuti ikipanganie kibombile lulalula. Akayapo nu mundu na yumoywene mu Lwitikano Ulupya, kangi ku fyinja bamia batatu ukufuma apo, ukwisila isyambukulu, loli bene babo baalyosigwe mu Ngamu ya Yeso Kristi. Ngimba iki kyo fiki? Ukwipangania. Uko ko kubombile ikyo. Ukupepusyako!

⁴⁸ Kangi umwisyugu abene begile bosa ababombela mu ngindi ukufuma mu ngindi. Abene basosisyemo u kisekese-ng’oma ukufuma nkipanga. Abene begile ulwimiko losa ukufuma ku kipanga, nukuyanabo ubulumbilili bakusukulu, ubulumbilili bwa kamkolwe-akakitili akakulu akanini, ikibugutila ikipuputigwe mosa, kangi abakikulu babo bikufwala ibundu ni myenda igi abene bifinyisyemo mu gyene, kangi abanyambala bikukwesa ingambo, nukukoma njuja nukuyoba isunga isyabulogwe. Ikyene kyo kikosyasoni pa nkyeni pa Kyala! Une mmenye ikyo kyo magengelemia, loli akene ko kabalilo akakuti umunduyumo ayobege ikindukimo. Ukulekako, ukulekela panjila, ukubombela bo kikisu kya pasi!

⁴⁹ Une ndikupasya kali une ngufimbilisigwaga ukwima nimwene, nu mundu nayumo loli Kyala mwene, une ngulumbililaga u Bwanaloli bwa Libangeli lya Kyala nu kwima panongwa ya Ubwene. Linga une ngufwa, une ngwimaga panongwa ya Bwanaloli. Naloliloli. Uswe tukulonda u Bwanaloli. Une ndikwiipimisyaga komma ku kipanga mma, loli ukufwanikisya ni Lisyu lya Kyala une ngulonda ukwipimisyaa.

⁵⁰ Loli Delila, ngimba umwe muketesisye? Umwene aamenye ukuti Samsoni aali na maka gamo. Kangi umwene akaamenye ukuti amaka gagaga gaali poki. Umwene akabagiile ukumanya

ukuti amaka aga gali fiki, loli galipo amaka amanywamu gamo aga Samsoni aali nago, kangu umwene alondaga ukugaga agene. Kangu, mumo Delila, umwene alinkumilisa ukumpepeka Samsoni panongwa ya bumogi bwake. O, umwene ifwikaga mwene mbulogwe bwa bwanaloli. Kangu umwene alinkwenda pa maso gake kangu umwene alinkutenia mumo bamo mwa batubwa abanini abalisiku lila, kangu—kangu na fyosa bo ifyo, kangu ukulonda ukubombela itolo bo ikindikimo ikingi, ukubonesya-ifyankati, ukugela ukunsonga Samsoni ku mwene.

⁵¹ Ikyo kyo kindu kilakila iki ikisu kya pasi kibombile ku kipanga. Lilino ngimba gali kugu a Maka gako amakulumba?

⁵² “Ena, linga uswe tukwipanganiaga, ikyo kikutumulaniaga a Maka.” Ikipanga kya Katolika kyabombile ikylene.

⁵³ “Loli abaFilisti bali pa ugwe, Samsoni.” Kangu abaLuteri balinkusoka panja.

⁵⁴ Polelo abene balinkwipangania kangu. “Linga ugwe kumbinyaaga une nu lugoye lumolwene, ulwene lukungamataga une.” Polele abene balinkubomba.

⁵⁵ “Kangu abaFilisti pa ugwe, Samsoni.” Ngimba fiki fyabonike? Wesley alinkusooka panja nukuswanyulania ingoye.

⁵⁶ “Lilino ugwe unsyobile une akabalilo kosa. Ngimba ugwe ukamanya ukuti une nguganile ugwe, Samsoni? Ena, mbula une ubwanaloli mu ndumbula yako.”

“Ena, ugwe mbinya une nu lugoye ulungi.”

⁵⁷ “Ena, lilino uswe tukubombaga ikyo.” Ngimba ikyo kyo fiki? Ulo lu lugoye lwafipaguko.

⁵⁸ “Ugwe nyitikisya une njege mwabuke, ukuti une ngaya nakyo ikipaguko. Polelo, une ngukubulaga ugwe, ugwe kumbongotola une.” Polelo panja balinkusooka abakiPentekositi. Ngimba a Maka gako gali kugu?

“AbaFilisti bali pa ugwe.” Kangu umwene alinkuswanyulania ingoye kangu.

⁵⁹ Loli lilino fiki fyabonike? Ikyene kisile ukuya bakiPentekosti, aba Dokotala ba Bunyakyala abanywamu ukuya batimi babo, unnyambala yumo unkulumba. Abene bamanyile isukulu ni nyiho fiyo ukufwana itolo na baMethodisti pamo baBaptisti, pamo balibosa ba bosa bali nafyo. Ukubuka nkipanga kangu ugwe ukabagila ukupilika nu “ameni,” ukuya batalalifu itolo ukufwana nikipambo kya baEskimo kulakula ku Kubumalikilo Kululu. Batalele! Batikupasya! “Kangu lilino abaFilisti bali pa ugwe, Samsoni.”

⁶⁰ AbaFilisti bali pa ugwe, Amerika. Buli kugu ubumobwene bwa mbepo? Buli kugu ubombwene bwa Pentekosti? Aba Assemblies of God, kangu aba United, kangu aba church of God, kangu *iki*, *ikyo*, ni *kinine*, kilikyosa pakyene ni ifimanyisyo ifikindane, uyu na *kila*, kangu uyu na *kila*. Uswe tubongotoligwe

fiyo mpaka uswe tubagile ukubuka nkaya ukuya nu lukomano, linga untimi yumoywene ikutulapo pa kyene, bosa ba abene batisakwisako nukwisako mma.Aba kiKomunisti bali pa ugwe, Amerika.

⁶¹ Ngimba a Maka gako gali poki? Ngimba ulwimiko lwako luli poki? Ngimba iki kyo fiki? Panongwa yakuti uswe twaakongile amahala ga mundu mbuyo bwa Maka ga Kyala! Fiki, abene balinabo abalumbilili bitu kangi ifindu fikafukafu kangi fyumilisi, mpaka abene batupangenie uswe mpaka uswe tuli itolo bumilisi kangi bakafu-makosi, mpaka abandu... Ngimba ugwe upilikemo ukulalata nkipanga kangi siku? Ugwe utikupilikamo siku yumo aligwesa ikukuuta. Ikikota kya aba bikukuuta kibikigwe nkipinda kyapasi. Lukayapo kangi ulwimiko nkipanga. Fyosa ifi uswe tukubomba ko kwitugasya nukwigemekesya kunyuma ukuya itolo myemyemye mumo uswe tubagile ukuyila. Uswe tukaya babuke'mma. Uswe tupinyigwe. U mohesi, ni misyetano gyake igyamwisyugu, apinyile ikipanga kya Kyala ugwabumi. Uko ko kutalusya. Gakayamo kangi na Maka nkipanga. Bukayamo kangi ubwabuke. Abandu bumilisi kangi bakafukafu fiyo! Fiki, u Kyala abagile ukwisa pakati pa bandu ba kiPentekosti, nukubonesya ukuti Umwene yo Kyala, nukusisimikisya ifika Fyake ifya busyuke Bwake, ikyene kitikubasenyenda abene na panandi. Lwimiko! Fiki, ikyene kikosyasoni! Une ngwenda ukukilania ikisu, Kyala ikubomba, ukubonesya ifika, kangi abandu bikwitugasya, nukuti, "Ena, une ngukikisya ukuti ifyo fili kanunu. O, une mmenye ikyo kibagile ukubombigwa." Ikyene kitikubagutapo abene! Fiki? Abene bapinyigwe na Delila, ikisu kya pasi. Abene bali mminyololo.

⁶² Lilino abene babatwele abene na mulamula, babapinyile abene mu kibungania-fipanga. "AbaFilisti bali pa ugwe, Samsoni." Ngimba ugwe kubombaga kiliku ukufwana ni kyene?

⁶³ "O, uswe tuli ni fipaguko ifikulumba." Naloliloli. "Uswe tuli na bandu bingipo ukukinda aba uswe twaali nabo." Loli u Mbepo ali kugu? Ngimba u Mbepo Mwikemo ali kugu?

⁶⁴ Ikyo kyo iki u mohesi abombile. Ikyene kipepekile nkati nkipanga. Ikyene kyumilise ukupepeka ikipanga, "Isaga kwa une, une ngukukupaga ugwe ikinyumba ikinywamu kuno linga ugwe kubombaga itolo *iki*. Linga umwe mukunsosyangapo undumbilili umumilisi uyu umwe muli nagwe, nukwega unnyambala, u Dokotala gwa Bunyakyala uyu ali nago amahala gamo, uswe tukuyengaga ikipanga ikinywamu ikimogi kangi uswe twisakuyaga bo aligwesa gwa bene." Isoni pa ugwe! Kinunupo ukuya nu nnyambala uyu akaamenye ukukindanisya u kofi ukufuma ku ndima, loli aalisusigwe nu Mbepo Mwikemo, uyu ali nsita kupepusyako, ukwisila mMaka ga Kyala.

⁶⁵ Loli ikyene kili nako, o, kikafukafu fiyo, mpaka umwikemo yumo undondo abagile ukusumuka mu lukomano nukuyobela

mu ndimi, pamo ukulalata panandi, pamo ikubomba ikindukimo, kangi bosa ba abene bikwibungania ukusyungutila nukuketa. “Ngimba kila kyali fiki? Ena, tukuswiga nongwanki? Yula abagile ukuya unyut’untu yumo isilemo ukufumakumo.” Umwe mumenye ukuti ikyo kyo bwanaloli! Umwikemo yumo undondo ingilemo, ukuya nhobofu ukufwana mpaka ukufyusa amaboko gabo, nukukuuta nukuntufya u Ntwa, umunduyumo yu isakukolela “ameni” ku bulumbilili bwa Nongwainunu, kangi abangi bosa bikusanukila kula nukuketa iki umwene ayobile. Abo ba Pentekosti. Fitamisye fiki? Umwe mukwegelela ukufuma ku baMethodisti, ukufuma ku baBaptisti; abene balyegelile ukufuma kwa baKatolika; Katolika alyegelile ukufuma ku gehena. Kangi, fyosa palikimo, ikyene kyosa ukufuma ku gehena! Kutalusya.

⁶⁶ Delila abapepekile umwe ukubuka mfipanga ifinywamu, ifinunu, abalumbilili abamanyili, ukwega ubwipime ubununuko. “Ena, ugwe ummenye, *Ugwakuti-nu-gwakuti* kuno yo gwa maelifu-elifu, linga uswe tubagile itolo ukummwega umwene ukwisa ku kilundilo kyitu! O, mwe!” Linga umwene akaya gwakupapigwa kangi, kokuti umwene atikufwana ukuya kula. Une ndikupasya kali umwene ali na madola maelifu-elifu. Linga umwene akabile ama Cadillac malongo mana, kali ali na fiki, umwene ikufimbilisigwa ukupapigwa kangi, ukwisa kulakula ku bupapigwe ubupya nukumela-kangi ukwisa mwa Mbepo Mwikemo, nukusooka ukufuma mula nu bupapigwe ubupya, ukupenga (nhobokela une), ukukuuta nukulila, nukuyammwanya mumu bosa ba abene bikubombela, nukuwitugasya ubumi ukufuma apo ukusisimikisya ukuti umwene alinayo Umwene. Ameni. Ikyo kyo iki umwe mukulondigwa.

⁶⁷ “Samsoni, aba Filisti bali pa ugwe.” Aba Komunisti bali pa ugwe. Ikisu kya pasi kili pa ugwe. U mohesi ali pa ugwe.

⁶⁸ Abene bikugomokela kangi abene bikuketa u Mbepo gwa Kyala ikubomba ifiswigo kangi ukubomba ifindu ifya busyuke Bwake, ifi Yeso aafingile, abene bikuyoba, “Ugwe umenye, une nginogona Nkundwe Branham ali nako kwingi ukuketala patali kwa minogono. Untimi gwangu aatile ikyene kyali kya mohesi.”

⁶⁹ Ugwe gwe ndondo, gwabusyobi, nsyobigwe nsitakyala, upuputigwa mosa, ugwe gwe kambwe mmyenda gya ng’osi! Yeso aayobile, “Linga umwe mwaalimmenye Une, umwe angali muliemnye ilisiku Lyangu.” Loli umwe muli ni fipambo fya baSauli aba bikugela ukubapela umwe ukuya bo kyosa ikisu kyapasi.

⁷⁰ Uswe tukulonda ikipambo kya banyambala ba Kyala aba batikupepusya pa Lisyu, loli bikulumbilila u Bwanaloli nukwima pa losyo lwa Mbepo Mwikemo.

⁷¹ Loli ikisu kyapasi kibombile fiki? Ikyene kisengile a Maka ginu gosa. Umwe mwaapapigwe baNazariti, Pentekosti, loli ikisu kyapasi naloliloli kisengile a Maka. Lilino ikyene kili itolo kikafukafu bo bosa abene.

⁷² Ngimba uswe tukubombaga kiliku? Ngimba kyo kiliki iki kikubonekaga? Kilipo ikindu kimokyene ikyalwimiko iki une mbagile ukwinogona ukumalisya ubusimbe ubu.

⁷³ Akabalilo kosa aka Samsoni ali mpinyigwe! Uswe tukabagila ukuya nu lusingimuko. Pilikisya kwa nkundwe unshiligwa, Billy Graham, “Ulusisimuko mu lisiku litu!” Pilikisya kwa Oral Roberts ikukuuta, “Ulusisimuko mu lisiku litu!” Pilikisya ku bosa ba abene, “Ulusisimuko mu lisiku litu!” Tukuyaga bulebutu nu lusingimuko akabalilo kako uswe tupinyigwe? Uswe tumpinyile u Mbepo Mwikemo, ni mbanganio ni nyiho syitu, kangu uswe tukabagila ukuya lusingimuko lwa Mbepo Mwikemo. Ameni. Une mmenye ikyo kikokya nubupyano, na kabalilo kake, loli ikyo kyo Bwanaloli. Tukuyaga bulebutu uswe nu lusingimuko lwa Mbepo Mwikemo akabalilo kako umwe mupinyigwe kangi muli bakafukafu fiyo! “Ububumbe bwa bunyakyala,” i Libangeli lyaayobile abene bikuyaga ngapo. “Ububumbe bwa bunyakyala, loli bikukanaga a Maka aga gali nkati.” A maka ga fiki? A maka ga lwipanganio? A maka ga kisu kyapasi? A maka ga kipanga? A Maka ga Mbepo Mwikemo! Ubo bo buyo ubwakufofu ubwa kipanga. Kangi akabalilo kako ikipanga kikwasima abalumbilili abamanyi, ni miyumba iminywamu ni minunu, mbuyo bwa Mbepo Mwikemo ugwa bubombelo-bwaiyolo, abene kinunupo bagomokele ku butumigwe kangi. Ameni. Fyabwanaloli. Ugwe kuyaga bulebutu nu lusingimuko ulwa Mbepo Mwikemo, kangi abandu bikusimisya Ikyene nukupinya Ikyene kangi bikukitila Ikyene? Apo po apa ulutamio lulipo.

⁷⁴ “Aba Filisti bali pa ugwe.” Loli ulusubilo lumolwene ulusayigwe ulu uswe tuli nalo, akabalilo kosa aka Samsoni aali nyumba ya baminyololo . . .

⁷⁵ Ngimba ikindu kyakwanda iki abene baabombile akabalilo kako abene balinkolile umwene? Abene balinkumpinya umwene, ikyakwanda. Abene balinkupoka a maka gake, abene balinkusyaga isyakusofu syake. Abene basyagile isyakusofu syako. Ikiisu kyapasi kisyagile isyakusofu syako. Lilino umwe bakikulu mwesa mukusenga inywili syinu, ikyene kikufwana itolo bo kisu kyapasi. Umwe banyambala mwesa mukubuka kukubombela bo kikisu kyapasi. Ikyene kilikanunu, ukuyoba isunga ni sunga inyanyasi, kangi nukusoka panja nukukwesa ingambo, nukubopa panja nu nkasi gwa mpalamani, ni findu ifingi filifyosa bo ifyo, ukunwa panini kwabwinake ukukolelela imbombo yako. Une kinunupo ngonega pa lwanda lwangu nukulya ifisyesyey nukunwa amisi ga nkisoko, nukwitugasya mwikemo pankyeni pa Kyala, ukukinda ukupepusyako

panongwa ya mbombo ya luko lulilosa. Uko ko kotalusya. Syabwanaloli. Itugasyaga gwabwanaloli kya Kyala.

⁷⁶ “Samsoni, aba Filisti bali pa ugwe.” Branham Tabernacle, ubwakisu-kyapasi bukwafulila nkati mmyinu. Fyo fiki ifya ifyene? Ngimba umwe mutwele panja ifyakusifu fyinu? Ngimba umwe mutwele panja ifyakusofu fila ifi Kyala akupele ugwe akabalilo kako ugwe gwabungulukaga mu lufumbi lwa matapwa ifyinja finini ifi fikindilepo? Ngimba ugwe ukitikisye ikylene ukwafulila mula nubwiputiputi bwabwinake, uwipanganie? Fyo fiki fibonike kwa ugwe? Kyala abagile ukusuluka nukubomba ifiswigo nukubuka mulamula mu kilundilo nukubabula abandu isyakusofu sya ndumbula syabo, na filifyosa, kangi ukubumbulunya ababine na bonywa, nukubomba ifika ni fiswigo, kangi ukulumbilila i Lisyu Lyake nubukafu mumo abene babagile ukubombela, nu Mbepo Mwikemo; kangi abandu bikuti, “Ena, une ngusakikisya ukuti ikyo momumo. Uswe tukwikyela ukupilika ku kyene kamokene pa kabalilo, linga uswe tukaya bakatale fiyo.” Uyo yo Branham Tabernacle. Aba Filisti bali pa ugwe.

⁷⁷ Akabalilo kala, kwaalipo akabalilo kako ukulumbilila kwa Lisyu, kangi abikemo abaiyolo na masosi mmaso gabo, basumukaga pa malundi gabo nukwendendeka, ukulila, lumo kisita kuyoba ni lisyu limolyene, ukwendendeka itolo ukusyungutila, kabile pamo katatu, nukwakwitugasya pasi, ukwisusigwa fiyo nu Mbepo Mwikemo! I Lisyu lyaabaswilaga abene! “Umunde atisakuya nu bumi nu nkati gwene, loli ni Lisyu lililyosa ili likufuma pa kanwa ka Kyala.” Bafilisti ali pa ugwe, Branham Tabernacle.

Bafilisti ali pa ugwe, mPentekosti.

⁷⁸ Ena, aba Filisti babagile umwe, mwesa ba umwe, iyolo fiyo akabalilo kako umwe mwipanganiege mwibene mbukafukafu fiyo, nakimo kilinkwisamo pene papo ugwe gwaali mPresibeteri, mBaptisti, mMethodisti, mKatolika, pamo ikindikimo. Ugwe ukuyaga nakyo nakimo ikyakubomba na bangi bosa abene.

⁷⁹ Polelo, ulusisimuko mu lisiku litu? Uswe tukuyaga nalo bulebule akabalilo kako umpa-lusasio ugwa bwila apinyigwe ni kisu kyapasi? Kyala akabagila ukwingila kuko ikisu kyapasi kili, ugwe ubagile ukusubila itolo pa ikyo. Ugwe kwendelana ni kisu kyapasi, polelo ikylene kyo—ikylene kyo kyosa kya ikylene. Akabalilo kako ugwe kwitikisya ikisu kyapasi ukwafulila mumo, ugwe kubuka ukubombela bo kikisu kyapasi, polelo ugwe umalike. Loli akabalilo kako ugwe kutumulaga iminyololo giligyosa ukufuma ku kisu kyapasi, nukwisa kwa Kyala, Kyala isakukubombelaga imbombo ugwe mpaka ugwe kubukaga ukwendendeka mmalaya kangi.

⁸⁰ Apa po lulipo lu lusubilo lwene ukuti une bombile ulubunju ulu, ukumalisya Indumi yangu, kyo iki, “Akabalilo kosa Samsoni apinyigwe, akabugutila akapya aka nywili kalinkutupuka.”

⁸¹ Kyala tutumilaga uswe Ikipanga ikingi itolo bo akabalilo ka bumalikisyo kakiisa, ukuti a Maka ga Mbepo Mwikemo gabagile ukwingile mwa umwene, mu kubonesya kwa Mbepo, kangi Mariko 16 abagile ukukonga Ikipanga, Imbombo 2:4, Imbombo 2:38, fyosa fya ikyene fisakukongaga mulamula itolo ni Kipanga. Ifika ni fiswigo fikukonga abatumigwa. Ifika ifikulumba ifya busyuke Bwake fikukonga abene. Akabalilo kosa uswe twali mminyololo, naloliloli Kyala ikubyalala imbeyu ku buyobumo, ukuti akabe ikinywamu ikyakubumalikisyo. Kiliyaga ugwe ikyene, mwinangu Nkristi apa ulubunju ulu, gali yaga maka gako aga gandile ukumela. Une ngwiputa ukuti Indumi iyi ulubunju ulu, kangi panja mfishu kuko iyene yikubukaga, une ngusubila ukuti Indumi iyi yikutwalaga ubutuli vitamini ku lwibatiko lwako iyi yikukulisyaga a Maka gamwambepo ukugomokela mbumi bwako kangi.

Unko uswe twinamisye imitu gyitu nukwiputa.

⁸² O Ntwa Kyala, Mpeli gwa Kumwanya na pasi, gwe Mwenenabo bwa Bumi Bwabwilanabwila, kambi Umpi gwa kyabupi kilikyosa ikinunu kangi ikyamwambepo, ega amasyu aga ulubunju ulu nukugabika agene mu ndumbula, kangi nukugonelela agene, Ntwa. Baliiputaga abandu pa findu ifi, papo tuketile ukuti ikisu kyapasi kipepekile ikipanga kangi kubumalikisyo kigagile a Maka gake, kibwagile ubuyo bwake bwakusofu, kibwagile kuko ikyakusofu kyake kilambalele, kangi ikyene kisengile ikyene mosa. Kyegile abandu aba akabalilo kamo balalataga ubuponjoli, akabalilo kamo baali nu buponjoli, kangi kibasengile abene mosa, ukubuka ukusyala ku kaya pa kilo kya Kitatu ukuti baketelege imbatiko sya senema. Kyegile ubuhobofu bwabo ukufuma mu ndumbula syabo, nukubapa abene ulugano ulwingip ulwakisu ukukinda ulu abene bali nalo kwa Kyala. Kibapele abene ikisu ikingipo, ku bwakisu, ukunyonywa kwingipo ku busangaluke bwakisu kyapasi ukukinda ukuya nu bulumbilili bwa Nongwainunu. Linga kikayapo ikibugutila ikinunu kya abakuba fyakwimbila kangi nukwegigwa posa, nukusekaseka kangi nukwegigwa posa, polelo abene batikulonda Inongwainunu inguulu, kangi mma, iyi yikutwala amasosi ga buhofu ku moyo, iyi yikutwala kangi ububumbulusyo Bwabunyakyala, iyi yikupyanikisya ifyabupi fyabatumigwa ku kipanga, iyi yikutwala nkati Kristi unsyuke, u Mesiya gwa lisiku ili.

⁸³ Loli mulamula Israel aapinyigwe na—na banyafyale babo, ukuti abene balinkutologwa ukukonga u Mwalafyala gwabwanaloli; kangi u Mwalafyale gwabwanaloli, akabalilo kako Umwene aalisile, abene balinkusita kumbona Umwene. Momumo kuyilile ukwene umwisyugu. O Ntwa, gwe Mwalafyale

gwa Lwimiko abonike mbubumbigwe bwa Mbepo Mwikemo, kangi, gwe Ntwa, abene batikukimanya ikyene mma. Abene batikukibona ikyene mma. Abene bipanganie fiyo nubukafu fiyo, mpaka abene batikukupilikisya ikyene, panongwa yakuti ikyene kikaya nkibugutila kyabo. Gwe Ntwa, iyi yo mbombo ya mohesi iki kibombigwe ku bandu aba.

⁸⁴ Ngusuma u Samsoni gwa Kyala, ngusuma ababwanaloli mu ndumbula, aba bo bikulondesya nu kulila, kangi ukupepeka nukukolelela, balitugasyaga ni kyene, Ntwa, mpaka ikimela ikipya iki kikumela kangi, mpaka pala bukwisaga kangi ubuhofu mu Siyoni, kangi pala kakwisapo akabunganie aka kabagile ukukibona nukupilikisya, aka kabagile ukumbona Mesiya na Maka amafisigwe ku kisu kyapasi, ukuti abene batisakupilisya lilino. Tupaga, Ntwa, ukuti abene bikukibonaga iki. Kabuno uswe tukusumila mu Ngamu ya Yeso. Ameni.

[Ubuyo ubusitakandu pa tepi—Nsimbi.]

. . . Maka itolo lilino,
O Ntwa, tuma a Maka itolo lilino
Kangi isyo aligwesa.

Abene baali nkipinda kyapamwanya,
Abene baali ndwitikisano lumo,
Bo u Mbepo Mwikemo asulwike
Uyu aafingiligwe nu Ntwa.

O Ntwa, tuma a Maka Gako itolo lilino,
O Ntwa, tuma a Maka Gako itolo lilino;
O Ntwa, tuma a Maka itolo lilino
Kangi osya aligwesa.

⁸⁵ Mumo une nunganiile Umwene! Itolo tuma a Maka Gake! Abene baali nkipinda kyapamwanya, bosa nu bwitikisano bumo. Ikisu kyapasi kyosa kyaalyonikemo ukufuma mu bene. Abene balyonekigwe mosa, yo nongwa Mbepo Mwikemo aalisile.

⁸⁶ Umwisyugu abene bikuyoba, “Gwe isa, ingila ikipanga, bika ingamu yako pa buku. Pamo inama pasi nukuyoba, ‘Une ngwitikisya Kristi ukuya Mwanundumiana gwa Kyala,’ ukusumuka mmwanya.” U mohesi ikubomba ikundu kilakila. Naloliloli. U mohesi alyosigwe akabalilo kako Yudasi aalyosigwe. U mohesi aasokile panja nukulumbilila Inongwainunu akabalilo kako Yudasi aasokile panja nukulumbilila Inongwainunu. Loli u mohesi alinkusita kwambilila u Mbepo Mwikemo. Ikyo kyo kyene. Apo po galipo a Maka amafisigwe pala, ubusyuke bula, ubu bukumanya ubununu, ukukinda unsyungulu guligosa ugwakwilamwa. Ameni.

⁸⁷ Umwene ali apa. U Mbepo Mwikemo yulayula, Yuyo uyu aali Mesiya, akali ali pa Kipanga Kyake. Umwene atikusokapo siku. “Une nguyaga na umwe bwila, na mukati myinu mope, mpaka kubumalikisyo bwa kisu. Une ngwisakuyangapo pala. Imbombo

isi Une ngubomba, numwe mwisakubombaga. Ukukinda sisisi umwe mwisakubombaga, kabuno Une ngubuka kwa Tata Gwangu.”

⁸⁸ Loli ikisu kyapasi kikupepusya ikylene, “O, ago go masiku aga gakindile!” Itolo iki mohesi ikulonda ugwe ukuti ubombe. Abene bikulonda ugwe ukumwekusya. Kyala ikulonda ugwe gosigwe. Kyala ikulonda ugwe... Ugwe kuyoba, “O, une ndikwitika fyosa ifi fili pala ifyakwegigwa-mosa.” Kindililaga nukuya nu bumi, kindililaga nukwitugasya mu butulwanongwa bwako, itugasyaga mu butulwanongwa bwako. Loli mpaka ugwe ubole, mpaka ugwe kubola ku fundo syako, mpaka ugwe kubola ku ifyakwimogesya fyako gwimwene, kangu ubagile ukwimesya kangu nukupapigwa kangu, kangu u Bumi ubupya bula bukuyaga bosa palikimi bukindane ukufuma ku bwene ubu bwaasulwike pasi.

⁸⁹ Aka mbeyo ka kilombe kakubuka pasi kali yelo, akene kakufyuka ka girini. Kakubuka pasi kakafukafu, kabikigwemo mula, akene kakufyuka kateputepu nukwelela nu m’belo. O, lwimiko! Haleluya! Akabalilo kako um’belo gukwanda ukuputa, imbeyu yikabagila ukubomba nakamo loli kwene kukwiyendesya yene, ukwelela, loli amani amanini—amanini gikwelela nukuhoboka, kakukula polelo, ukwikasya kene. Akene kakabagilamo siku ukuya lyani mpaka ikilombe kiye kifwano kangu kibolano. Ukufwa kwene mma; loli kibolano. Kikabagile ukugomoka kangu mma, loli u bumi bukwisa ukufuma ku kyene.

⁹⁰ Mumo une njobiile pitasi, ukupapigwa kindu kipelabusiya fiyo, kinyanyasi, kibwapufu, kinyanyasi ukukinda ubunyanyasi bosa, loli mula mu ubumi bulambalele. Akabalilo kako ugwe kwiyagania gwimwene ukuya gwakinyanyasi, kwiyagania ubunyanyasi bwa fimanyisyo fya Methodisti, Baptisti na Pentekosti, nukufwa mosa pa kigemo, polelo u Bumi ubupya bukwingilaga. U Mbepo Mwikemo ikukupela ugwe ukuya pamwanya pa ikyo; ugwe kuketa Kyala.

⁹¹ Uswe twisakunketa Umwene ilisiku lya lwimiko limo. Ilisiku limo ukukinda kubufike bwa bumanyi bwakufwa, uswe twisa kunketa Umwene. Ugwe kwitika ikyo? Ilisiku limo ukukinda kubufike bwa bumanyi bwakufwa, kula kukungulila une u kilabo ugwabuhobofu.

⁹² Une nalimile pamwanya apa pa ngilano nkilo mmayolo, nukwinogona ukuti une nalimbwene u Rabbi Lawson unnini. Akabalilo kako umwene bwila itugasyaga apa, kangu isaga ukusyungutila ni ngili yake inguulu nukungwabila une kifuki na makosi gake, ukusyungutila amakosi gangu ni ngili yake, pamwanya apa ku kigemo, nukwimba ulwimbo lula, “Kula kukungulila une u...” [Ubuyo busitakandu pa tepi—Nsimbi.] ...?...

⁹³ Ikindukimo kyabonike! Ikyene kilinkusosyamo ikisu kyapasi panja. Une ndinkwanda ukuketa ifindu nu bukindane. Une mbasisye fiyo ukufwana na mumo abandu aba abakiMerika bikubombela, ukukindilisa, kyinja ni kyinja, ukuketa abakikulu na banyambala mumo abene bikwiyuyulila nukwingila mbutulwanongwa, mpaka une ngusyala panandi ukusilika, kabili pamo katatu, ukupasya pa ikyene. Mmayolo, une nayobile kwa Kyala, “Une ndikupasyaga kangi’mma. Ilisyu Lyako lyaayobile ubwene kikuyaga lululo. Loli une ngwimaga pakati nukulalata ukulwana ni bwene, na fyosa ifi fili mwa une.”

⁹⁴ Ilisiku ilingi, nimile pamwanya pa Green’s Mill, imbako yangu, kubutali kula ku matengele, nafumile pa kwiputal ilisiku lyosa. Kangi ukufwana isala ya butatu, ilisuba likwingila, kangi une nalimile pamwanya pala nguketesa ukukilania, nsokile panja pa mbako, pamwanya pa libwe ilinywamu. Kangi une nalimile pala, ukuketa ku Busokelo-lisuba, ukuntufya u Ntwa. Kangi une ndinkuketa ilisuba likusuluka pasi kunyuma kwa mipiki pa mwanya pa kyamba, akabalilo kako une nguketa ukukilania ifyamba fya mabwe ukukilania ifingi, kangi imipiki mingi pa fyene, kwali itolo kimyemye mumo ukwene kwabagile ukuyila. Kangi une ndinkuyoba, “Gwe Ntwa, ilisiku limo Ugwe gwalimfisile u Mose mu mbako ya libwe, kangi Ugwe ulinkukilania kifuki nu mwene, panongwa yakuti umwene aakatele. Loli Ugwe gwakilenia kifuki, umwene alinkuti, ‘kyaboneka ukuya nyuma ya nnyambala.’” Une ndinkuti, “Mfisa une mu mbako, gwe Ntwa.” Ukufwana akabalilo kala, ukufuma ku lubafu lwangu lumo, pala palinkwisa u M’belo unnini gukusuluka pasi ukukinda mmipiki. Ugwene gulinkwenda mulamula itolo, ukusuluka pasi palapala pa lubafu lwangu, u M’belo unnini gukusuluka pasi, gwabukile pasi ukukinda mmipiki. Une naalimile pala.

Ilisiku limo, Kyala yo mwene amenye ukuti
poki pamo ndili,
Amaguudumu ga bumi bufwe bwisakwima
kimyemye,
Polelo une ngubukaga ukwakwitugasya pa
kyamba kya Siyoni.
Ilisiku limo ukukinda ubufike bwa bumanyi
bwakufwa,
Ilisiku limo, Kyala yo amenye ukuti poki pamo
ndili,

Kikubonekaga fiki? Umwene ikwigalaga, utuguudumu tosa utunini ukusyungutula.

Amaguudumu ga bumi ubwakufwa gisakwima
kimyemye,
Polelo uswe twisakubukaga ukwakwitugasya
ku kyamba kya Siyoni.

Sulukaga pasi, gileta unyafu,
 Kwisa ukunyamulila une ku Kaya;
 Sulukaga pasi, gileta unyafu,
 Kwisa ukunyumulila une ku Kaya.

Linga ugwe kufika kula bo une ngaali,
 Kwisa ukunyamulila une ku Kaya;
 Mbula Nkundwe Bosworth, na binangu bosa,
 bope,
 Itolo ukwisa ukunyamulila une ku Kaya.

Lilino sulukaga pasi . . . (Umwene
 isakusulukaga pasi ilisiku limo
 nukunnyamula une mmwanya.) . . . gilet- . . .
 (Umpiki guligosa gwisakuyaga pamoto; a
 Bandumi ba Kyala, igileta lya moto) . . .
 ukunnyamulila une ku Kaya;
 Sulukaga pasi, gileta unyafu,
 Kwisa ukunnyamulila une ku Kaya.

⁹⁵ Limolyene mwa masiku aga, limolyene lya masiku aga
 mfiyabo fyapasi mu sala sya bufwe bwangu, une ngundondesya
 Umwene ukuti ikwisa. Uko ko kotalusya.

Une naketile ukukilania Yorodani kangi
 naketile fiki une
 Kwisa ukunyamulila une ku Kaya; (bo yu Eliya
 gwaiyolo ikuketa ukukilania Yorodani)
 Ikibugutila kya Bandumi abamulike bikwisila
 une,
 Abene bisaga ukunyamulila une ku Kaya.
 Suluka pasi, uyege pasi pasi, gileta unnyafu,
 Kwisa ukunnyamulila une ku Kaya;
 Suluka pasi, gileta unnyafu,
 Kwisa ukunyamulila une ku Kaya.

⁹⁶ U Ntwa Yeso, u Mwendesi unsayigwa gwa gileta ili, u
 Ndongosi pa sitima ingulu ya Ziyoni, ubwato bwa Bumi,
 ukwendendela ukusuluka ukukinda nnyumba iyi, ikuyoba, u
 Kuyapo Kwake kuli apa. Yulayula u Mbepo Mwikemo uyu
 ansusisye Umwene ukufuma mu lipumba ali ap.

⁹⁷ Panongwa yakuti abene bakayabania a makadi ga lwiputo,
 ngimba alipo aligwesa uyu isile ukufuma panja pa kaya aka,
 uyu une ngammanya, uyu ali apa ukwiputilligwa? Fyusya
 mmwanya ifiboko fyinu, aba une ngabamanya. Fyusya ifiboko
 fyinu mmwanya, une ngabamanya. Ugwe, ugwe apo. Une
 ngusubila umwinitu unnini ali ni ndefu syapambulo kunyuma
 kula, umunduyumo afyusisye ikiboko kyabo kunyuma kubwa
 kula. Ena, ugwe, ngimba gwaafyusisye ikiboko kyako? Umma
 ndaga. Kunyuma kula, ugwe, nkulumba. Umma ndaga. Umwe
 mwesa bahesya kwa une? Untwa Yeso yula, u Ntimi yulayula
 ugwa ntimo apa, ngimba umwe mukwitika uluifingo lwake

lwabwanaloli? Umwene ikonelela ikipanga Kyake, kangi “Imbombo isi Une ngubomba, mwisakubombaga umwe, numwe. Kangi inywamupo ukukinda isi mwisakubombaga umwe, kabuno Une ngubuka kwa Tata Gwangu. Ukukinda isi!” Umwe mukwtika ikyo?

⁹⁸ Ngimba ugwe gwafyusisye ikiboko kyako ukuti ugwe ukammanya une? Ngimba ugwe kwitika Kyala ukuti abagile ukumbula une iki kili mu ndumbula yako, abagile ukuyoba kwa une mumo itolo Umwene aabombile ku nkikulu uyu aapalamasisye umwenda Gwake? Ngimba umwe mukwtika ukuti Umwene yo Mputi Nkulumba uyu abagile ukupalamasigwa nu bwipilike bwa bonywa bwitu? Linga Kyala isakusetulaga kwa une ubuyilo bwako, ngimba ugwe kwitikaga une ukuya nsololi Gwake, ukwitiga ukuti u Kuyapo Kwake kuli apa kangi iyo yo nongwa Umwene ikwitikisya ikyene? Ugwe kwiputula unkasigo. Umwene ali nu nsana unkonyoke, unsana unsopoke. Uko ko kotalusya. Linga ikyene kyo kitalusye, sumuka. Silikanu syosa, buka ukammwage umwene, alikanunu. Amen.

⁹⁹ Ngimba bule ugwe kunyuma kula, umwinitu unnini uyu afyukile mmwanya, uyu aali ni ndefu sya pa mbulo? Ugwe kwitika ni ndumbula yako yosa? Ngimba ugwe kwitika Kyala abagile ukumbula une indamio syako? Kwitika ukuti umwanako undumiana isakuyaga kanunu? Ugwe kwitika? Ali nu ndumiana, umwene ali ni mbungo ya bukokonyale. Uko ko kotalusya. Ugwe ukaya. . . Ikyene kyo kufuma ku Kentucky. Linga uko ko kotalusya, fyusya ikiboko kyako mmwanya. Une ngakumanya ugwe, ngimba une ngimba? Linga une ngi. . . Fyusya ifiboko fyako bo *ulu*, uswe tukumanyano yumo nu nnine. Uko ko kotalusya. Ukusubila kya Kyala. Ngimba ugwe kwitika? Mumo ugwe kwitikila, kammwage umwan'undumiana gwako mumo ugwe kwitikila. Bika itolo ugwe pa ndumbula yako.

¹⁰⁰ Ngimba ywani apa uyu aafyusisye ifiboko fyake, ukuti une nga—nga. . . Gwaali ugwe bule? Umma ndaga, tata, ngimba kwitika une ukuya nsololi gwa Kyala? [Unnyambala yula ikuyoba, “Ameni.”—Nsimbi.] Ugwe kwitika, ni ndumbula yako yosa? Ugwe utikufimbilisigwa ukufyukila mmwanya, ima itolo papapo apo. Umma ndaga, nkulumba, kitamisye fiki, ugwe uli mbungo ya syuga diyabitisi. Kangi ubwene bukutamia ikilundi kyako. Ugwe ufumile ku Ohio. Ingamu yako yo Tata. Miller. Gomokelaga ku nyumba nukuya kanunu. Umma ndaga, itikaga ni ndumbula yako yosa. Umma ndaga.

Ugwe kwitika ni. . . ? Itikaga ikyene. Linga ugwe ubagile ukwitika!

¹⁰¹ Unkikulu uyu itugesye apa, ngimba ugwe gwafyusisye ikiboko kyako? Unkikulu unywamu, afwela amandalasi, ugwe kwitika ni ndumbula yako yosa? Ugwe kwitika ni. . . Ugwe kwitika une ukuya gwambombo gwa Kyala? Ugwe kwitika?

Umma ndage, linga Kyala abagile ukumbula une ukuti ulutamio lwako lo luki, kwitika ugwe? Imbungo ya ndumbula. Umma ndaga, fyusya ikiboko kyako linga ikyo ko kutalusya. Umma ndaga.

¹⁰² Unkikulu apa kifuki na ugwe, fyuka mmwanya. Indumbula; loli fiyofiyo go maso gako. Une nummenye umwene. Umma ndaga, linga ugwe ubagile ukwitika!

¹⁰³ Kunyuma kula, unnyambala uyungi kunyuma alipo alinayo imbungo ya ndumbula, yope, ni mbungo ya kipapa. Ngimba ugwe kwitika ukuti Kyala ikukupelaga ugwe ukuya kanunu? Ugwe kwitika, nkulumba?

¹⁰⁴ Aliko unnyambala kunyuma kubwa kula uko, aafyusisye ikiboko kyake ukuti umwene aka...Tata. Schubert. Umma ndaga, nkulumba. Umma ndaga, ngimba ugwe kwitika? Iyene yo nongwa ya maso gako, nuwe, bule? Ugwe kwiputula u mama gwako itugesye panja pala. Linga ikyo ko kutalusya, fyusya ikiboko kyako. Uswe tuli bahesya. Ngimba momumo? Poniana pa kiboko, poniano pakiboko yumo ku nnine. Umma ndaga, umma ndaga. Linga ugwe ubagile ukwitika, ugwe ubagile ukwitika!

¹⁰⁵ U Yeso Kristi unsyuke ali mu nyumba iyi. Umwene yo Yuyo yulayula. Ngimba Ikyene kukubomba fiki kwa ugwe? Ngimba ugwe gwitikisya ikisu kyapasi ukunwa amaka gosa ukufuma kwa ugwe? Lwimiko! Une ngulonda ukupapigwa ukupya! Une ngulonda u Bumi ubupya! Une ndikupasya ukuti yo ndegenki Ubwene bukwisamo, linga une ngufimbilisigwa ukuya mbunguluka mwikemo, kilikyosa. Une ndikupasya ukuti yo ndegenki Ubwene bukwisamo, une ngulonda u Mbepo Mwikemo ugwabwanaloli bo yuyo ali pa une lilino. Une ngulonda ukukolelela Umwene! Une kinunupo njege nu Mwene ukukinda ifindu fyosa ifya nkisu kyapasi. Ameni! Ngimba umwe mukwitika? Ngimba umwe mukwitika Umwene ali apa?

¹⁰⁶ Bika amaboko ginu yumo pa nnine, lelo. Mbula ikindu kimokyene ukongelelapo iki Umwene aabagile ukubomba. Nakimo. Yaga nu lwitiko lilino. Itika ikyene kimalike.

¹⁰⁷ Gwe Ntwa Kyala, Mpeli gwa Kumwanya na pasi, Mwenenabo gwa Bumi Bwabwilanabwila, kangsi Mpi gwa fyabupi fyosa ifinunu, Mbepo Gwako ali apa ikonelela fiyo, Ntwa, yikufwana inyumba iyi yikutuya, yikugutigwa ukubuka nu kugomokela. Ngimba fiki abandu bikutoligwa ukukipilikisya ikyana, gwe Ntwa? Ngimba abene—ngimba abene bayiile pabwinake fiyo ni kisy kyapasi fiyo, nukuya batalalifu fiyo nukuya balubatiko kangsi bakafukafu, mpaka abene bikutoligwa ukukumanya Ugwe kangsi'mma? Gwe Ntwa Kyala, a Maka aga galikomaga aligwesa, kangsi umundu umbine aligwesa alibumbulukaga, untulwanongwa aligwesa alipokigwaga, kangsi

Kyala ikwegaga ulwimiko. Mwa Yeso Kristi, u Mwanundumiana gwa Kyala, une ngusuma. Amen.

¹⁰⁸ Ngimba ugwe kwitika ikyene? Fyusya ifiboko fyinu. Ngimba umwe mwikwitisya ububumbulusyo bwinu? Kyala abasaye umwe. Lilino bukaga nukwakukyaga ikyene itolo mu njila umwe mukwitikila, ikyene kikuyaga injila yilayila. Une nguketa imboniboni sikwisa pamwanya pa nnine. Uko kutalusya. Une ngufimbilisigwa ukugomokela apa ikilo iki.

¹⁰⁹ Linga ugwe utikwitika lilino, ugwe utisakwisakwitikamo siku. Uko ko kutalusya. Yeso aabombile ikyene akabalilo kamo, kangu abene balinkuyoba, “Ugwe gwe. . . Uswe tumenye akabalilo kako Mesiya ikwisa, Umwene isakutubulaga uswe isi.” Umwene alinkuti, “Une mmenye ukuti Mesiya isakubombaga ikyo. Loli Ugwe Yugwe ywani?”

Umwene alinkuti, “Une yone Umwene.”

¹¹⁰ Polelo umwene alinkubopela nkaya nukuyoba, “Mweisa, mukete u Nnyambala Uyu amenye ifi une naali kangu isi une mbombile. Ngimba akaya yo Mesiya?”

¹¹¹ Umwene alinkuti, “Ifindu ifi fikubumbigwaga kangu mmasiku agabumalikisyo. I Kipanga kisa kulumbililaga u Bwanaloli, Ikyene kisa kwimaga pa Lisyu. Ikyene kisabombaga syosa Indagilo sya Kyala. Ikyene kitisakulyelanilana ni kisu kyapasi mma. Kangu ukukinda mula Une ngwisakwendaga nukubomba ifindu filafila.”

¹¹² Loli Umwene alinkuti, “Abene bisakuyaga ba mmutu, bamahala ga pamwanya, bagana ifyakusangulusya ukukinda ukugana Kyala, babongotola lwitikano, balongi babutungulu, bali nu bubumbe bwa bunyakyala,” biputiputi fiyo, ukubuka ku fipanga. “Ukuya nabo ububumbe bwa bunyakyala, loli bikukana a Maka aga galinkati. Ukufuma ku luko ulu sokako!”

¹¹³ Mwe bandu umwe, kulikosa umwe mwaali mu kipanga, umwe Umwene abakolile itolo lilino, imboniboni yikindile ukufuma kwa une. Linga—linga ubo bwaali bwanaloli, iki une njobile, kangu une ukuya nsitakumanyikigwa kwa ugwe, fyosya ifiboko fyinu, aligwesa uyu umwene aali. Mosa nkipanga, umundu aligwesa—aligwesa. Umma ndaga. Muketile? Ngabamanya abene, ngababonamo abene siku; loli u Mbepo Mwikemo ali apa kangu Umwene abamenye abene. Ngimba mukabagile ukuketa ukuti ikyo akaya une mma?

¹¹⁴ Pilikisya! Linga Umwene ikunsubilaga une na ikyo, Umwene ikunsubilaga une nu Bwanaloli bwa Lisyu, panongwa yakuti u Bwanaloli bubagile ukwisa mwene mu Lisyu. “Pinduka, aligwesa gwa umwe, kangu osigwaga mu Ngamu ya Yeso Kristi, ku puputigwe lwa butulwanongwa, kangu ugwe gwisakwambililaga ikyabupi kya Mbepo Mwikemo, kabuno ulufingo luli kwa umwe na ku bana binu, babo bali kubutali, kangu na bubwingi bwa babo Untwa Kyala gwitu

isakubakolelaga.” Umwe mukwitika ikyene? Kukuyangapo ulosyo itolo lululu ulu.

¹¹⁵ Unko twinamisye imitu gyitu. Une ngunsuma untimi ukwiputa akabalilo kako abene bikutendekesya ku losyo. Une ngwinogona lukuyangapo ulukomano lwa losyo lukwisa. Umma ndaga.



IKIPANGA IKISYOBIGWE, NI KISU KYAPASI KYA59-0628M

(A Deceived Church, By The World)

ULUBAMBIKO LWA KIPANGA

Ubulumbilili ubu butwaligwe nu Nkundwe William Marrion Branham, ubu pakwanda bwatwaligwe nki Ngereza pa Ndungu ku lubunju, Juni 28, 1959, ku Branham Tabernacle mu Jeffersonville, Indiana, U.S.A., bwegigwe pa busimbe bwa tepi ya magneto kangi busimbigwe kisitakutumula mu ki Ngereza. Ukusimba ukwa mu Kyangonde ubu bwasanusigwe nu kuyabanisigwa na ba Voice of God Recordings.

KYANGONDE

©2022 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org